

## HUGHES, JOHN ('Glanystwyth'; 1842 - 1902), gweinidog Wesleiaidd

**Enw:** John Hughes  
**Ffugenw:** Glanystwyth  
**Dyddiad geni:** 1842  
**Dyddiad marw:** 1902  
**Priod:** Emily Hughes (née Wilcox)  
**Plentyn:** Henry Maldwyn Hughes  
**Rhyw:** Gwryw  
**Galwedigaeth:** gweinidog Wesleiaidd  
**Maes gweithgaredd:** Crefydd; Eisteddfod  
**Awdur:** Edward Tegla Davies

Ganwyd 15 Ebrill 1842 yng Nghwm-magwr Isaf, ger y Cnwch Coch, Sir Aberteifi. Wedi ychydig addysg yn ysgol Llanfihangel y Creuddyn aeth yn was fferm (1854), yna am dymor i waith mwyn, dychwelyd am dymor yn was fferm, ac yna i chwarel ym Mlaenau Ffestiniog (1863). Dechreuodd bregethu yno. Aeth i ysgol Jasper House, Aberystwyth (1865). Derbyniwyd ef i'r weinidogaeth yn 1867. Llafuriodd yn Nhreherbert (1867), Aberpennar (1868), Caerdydd (1869), Tre'r Ddôl (cylchdaith Aberystwyth) (1872); Trefeglwys (cylchdaith Llanidloes) (1873), Machynlleth (1876), Coed Poeth (1878), Caernarfon (1881), Llanrhaeadr Mochnant (1884), Llundain (1886), Rhyl (1889), Manceinion (1891), Lerpwl (Mynydd Seion) (1894). Bu'n oruchwyliwr y Llyfrfa (1897). Bu farw 24 Chwefror 1902.

Priododd Emily, merch y Parch. Henry Wilcox. Mab iddo oedd **Henry Maldwyn Hughes**. Golygodd *Y Winllan*, 1874-7; *Y Gwyliedydd*, 1890-2; *Yr Eurgrawn*, 1897-1902. Ef oedd golygydd y llyfr emynau newydd, 1900. Ysgrifennodd *Arwrgerdd John Penri*, *Oesau Boreu y Byd*, *Bywyd Crist*, *Delw y Nefol* (pregethau), *Esponiad ar y Colosiaid*, *Cofiant Isaac Jones*. Ef oedd cychwynnwr y mudiad i gael papur newydd enwadol, *Y Gwyliedydd*, 1877, a'r mudiadau i gael cymanfa Wesleiaidd Gymreig, 1899, a rhannu talaith y Gogledd, 1902. Ef oedd yr ail orau ar y bryddest yn eisteddfod genedlaethol Aberystwyth, pan oedd yn efrdydd yn Jasper House, yr ail orau yn eisteddfod genedlaethol Llundain, 1887 - y gorau yn ôl '*Dafydd Morgannwg*,' yr ail orau yn eisteddfod genedlaethol Llanelli, 1895. Yr oedd yn feirniad y bryddest yn eisteddfod Lerpwl, 1900. Ef oedd cadeirydd pwyllgor cyffredinol eisteddfod Llundain, 1887. Y mae ganddo amryw emynau adnabyddus. Etholwyd ef yn 1901 yn llywydd y gymanfa, ond bu farw cyn ymgymryd â'r swydd.

### Awdur

**Y Parchedig Edward Tegla Davies**, (1880 - 1967)

### Ffynonellau

David Gwynfryn Jones a H. Maldwyn Hughes, *Cofiant Glanystwyth sef, Bywyd y diweddar Barch. John Hughes, D.D*(Bangor 1904)

*Yr Eurgrawn Wesleyaidd* coffa, Mai 1902

### Delweddau

Hugh Humphreys, John Hughes

### Dolenni Ychwanegol

VIAF: 103065890

Wikidata: Q18954350

**Dyddiad cyhoeddi:** 1953

**Hawlfraint Erthygl:** <http://rightsstatements.org/page/InC/1.0/>

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n tudalen codi arian am ragor o wybodaeth.



Arddull APA



Davies, E. T., (1953). HUGHES, JOHN ('Glanystwyth'; 1842 - 1902), gweinidog Wesleaidd. *Y Bywgraffiadur Cymreig*. Adferwyd 20 Tac 2024, o <https://bywgraffiadur.cymru/article/c-HUGH-JOH-1842>

Preifatrwydd

Preifatrwydd a Chwci  
Hawlfraint  
Y Prosiect  
Cymorth  
Cysylltu



LLYFRGELL  
THE NATION



Yn ddiolch i  
Llywodraeth Cymru  
Supported by  
Welsh Government